



Bosnia and Herzegovina  
STATISTICAL COUNCIL OF  
BOSNIA AND HERZEGOVINA

Broj:11-07-3-80-2 /17  
Sarajevo, 03.02.2017. godine

**ZAPISNIK**

sa konstituirajuće sjednice Vijeća za statistiku BiH

Dana 02. 02. 2017. godine sa početkom u 12:00 sati u prostorijama Agencije za statistiku Bosne i Hercegovine, održana je konstituirajuća sjednica Vijeća za statistiku BiH.

Sastanku su prisustvovali članovi Vijeća za statistiku BiH:

**Gospodin Velimir Jukić, direktor Agencije za statistiku BiH,**  
član Vijeća za statistiku Bosne i Hercegovine;  
**Gospodin Fadil Fatić, zamjenik direktora Agencije za statistiku BiH,**  
član Vijeća za statistiku Bosne i Hercegovine;  
**Gospodin Miljan Popić, zamjenik direktora Agencije za statistiku BiH,**  
član Vijeća za statistiku Bosne i Hercegovine;  
**Gospodin Amir Hadžiomerađić, Centralna banka BiH,**  
član Vijeća za statistiku Bosne i Hercegovine;  
**Gospodin Boris Raić, Ministarstvo finansija i trezora BiH,**  
član Vijeća za statistiku Bosne i Hercegovine;  
**Gospođa Mira Vujeva,**  
član Vijeća za statistiku Bosne i Hercegovine;  
**Gospodin Sahrudin Sarajčić,**  
član Vijeća za statistiku Bosne i Hercegovine;  
**Gospodin Njegoš Pavlović,**  
član Vijeća za statistiku Bosne i Hercegovine;  
**Gospodin Emir Kremić, direktor Federalnog zavoda za statistiku,**  
član Vijeća za statistiku Bosne i Hercegovine;  
**Gospođa Radmila Čičković, direktor Republičkog zavoda za statistiku RS,**  
član Vijeća za statistiku Bosne i Hercegovine;  
**Gospođa Senija Fačić, rukovodilac podružnice Brčko distrikta BiH,**  
član Vijeća za statistiku Bosne i Hercegovine.

Direktor Agencije za statistiku BiH gosp. Jukić pozdravio je prisutne i utvrdio da su na sjednici prisutni svi članovi Vijeća za statistiku. Za konstituirajuću sjednicu Vijeća za statistiku predložen je sljedeći dnevni red:

1. Usvajanje Pravilnika o radu Vijeća za statistiku BiH
2. Izbor predsjedavajućeg i zamjenika predsjedavajućeg Vijeća
3. Statistički program Bosne i Hercegovine za period 2017-2020.
4. Plan rada Agencije za statistiku BiH za 2017. godinu
5. Razno

Predloženi dnevni red je jednoglasno usvojen.

**Ad 1.** Gosp. Jukić je naglasio da su članovima Vijeća dostavljena dva prijedloga Pravilnika: jedan kojeg je uz Poziv dostavila Agencija za statistiku i drugi koji je pripremila članica Vijeća, gđa Vujeva. On je dao riječ gđi Vujeva koja je prisutne upoznala s razlozima pripreme sasvim novog teksta Pravilnika kao i sa njegovim sadržajem.

Gosp. Kremić i gđa Čičković iznijeli su primjedbe na tekst Pravilnika o radu koji je pripremila Agencija za statistiku BiH.

S obzirom da su dva prijedloga Pravilnika o radu Vijeća, nakon diskusije i iznošenja prijedloga prisutnih, zaključeno je da se svi komentari razmotre i da se za jednu od narednih sjednica pripremi novi prijedlog u skladu sa komentarima i prijedlozima koji su dostavljeni, a da se na ovoj sjednici razmatraju ključna pitanja, važna za nastavak rada Vijeća i u tom smislu izvrše izmjene i dopune važećeg Pravilnika o radu Vijeća za statistiku.

Jedno od važnih pitanja je pitanje kvalificirane većine za donošenje odluka, te je prijedlog gđe Čičković bio da to bude konsenzus. Odnosno, prijedlog je usvojen kada je postignut konsenzus članova Vijeća.

Prijedlog gosp. Popića je da to bude većina prisutnih članova plus predsjedavajući i zamjenici. Gosp. Fatić je predložio da kvorum bude većina od ukupnog broja članova Vijeća.

S obzirom da su različiti stavovi članova Vijeća oko pitanja kvoruma, gosp. Pavlović je predložio kao kompromisno rješenje da kvorum bude većina od ukupnog broja članova s tim da je potreban po jedan predstavnik iz svakog konstitutivnog naroda. Gosp. Fatić istakao je da se ovako stroga forma ne primjenjuje ni u Vijeću ministara BiH, osim za odluke koje ne idu na dalja usvajanja, a za sve one odluke koje će dalje usvajati druga tijela potreban je samo natpolovična većina od ukupnog broja članova. Sa ovom konstatacijom složio se i gosp. Jukić. Gđa Vujeva smatra prihvatljivim rješenje da Vijeće odlučuje natpolovičnom većinom ukupnog broja članova Vijeća.

Na kraju rasprave o ovoj temi, pitanje kvalificirane većine za odlučivanje ostavljeno je za razmatranje za jednu od narednih sjednica kada se bude raspravljalo o novom Pravilniku o radu Vijeća.

Prisutni su razmatrali prijedlog da se osnuje kolegij Vijeća, ali nakon kratke diskusije odlučili su da nema potrebe za osnivanjem kolegija. Nadalje, iznesen je prijedlog da se važeći Pravilnik o radu Vijeća dopuni u članu 5. na način da je određeno da predsjedavajući ima dva zamjenika predsjedavajućeg Vijeća. Ovaj prijedlog jednoglasno je usvojen.

**Ad 2.** Gosp. Jukić smatra, da predsjedavajući Vijeća i zamjenici trebaju biti iz reda članova Vijeća imenovanih od strane Vijeća ministara. Iznio je prijedlog da predsjedavajući Vijeća bude gosp. Sahrudin Sarajčić, zamjenici predsjedavajućeg gđa Mira Vujeva i gosp. Njegoš Pavlović. Prijedlog je jednoglasno usvojen.

**Ad 3.**

Predsjedavajući Vijeća gosp. Sarajčić zahvalio se na ukazanom povjerenju. Pozvao je direktora Agencije za statistiku BiH da obrazloži Prijedlog statističkog programa Bosne i Hercegovine za

period 2017. do 2020. godine. Gosp. Jukić upoznao je prisutne s postupkom izrade i ukratko sa sadržajem ovog dokumenta. Napomenuo je da Zakon o statistici BiH predviđa donošenje programa za period od 4 godine te da je standard u Evropskoj uniji da se ovakav dokument donosi za petogodišnji period i da će u budućem programskom periodu zasigurno ovaj standard biti prenesen i u BiH. Nakon izlaganja gosp. Jukića, predsjedavajući Vijeća, gosp. Sarajčić je otvorio raspravu po trećoj tački dnevnog reda. Uslijedila je diskusija o Prijedlogu Statističkog programa.

Gđa Čičković je pohvalila Prijedlog statističkog programa Bosne i Hercegovine za period 2017-2020, ali je ostala pri svojim komentarima koje je ranije Republički zavod za statistiku dostavio Agenciji za statistiku BiH i koji nisu prihvaćeni.

Gđa Vujeva je istakla će podržati predloženi dokument budući da je prema informaciji direktora Agencije ovaj dokument u najvećoj mjeri usaglašen sa entitetskim zavodima za statistiku. No, ipak, u cilju poboljšanja službene statistike u Bosni i Hercegovini iznijela je određena razmišljanja i preporuke za buduće aktivnosti:

- radi uključivanja i informisanja šire javnosti, preporučuje da se u postupku izrade nacрта višegodišnjeg programa pa i godišnjeg plana provođenja statističkih istraživanja, ovi dokumenti učine dostupni zainteresovanoj javnosti objavom na internetskoj stranici Agencije ostavljajući mogućnost za davanje primjedbi i prijedloga; Također, u smislu ove teme, preporučuje da se učine napori u cilju popularizacije službene statistike na društvenim mrežama koje su postale općeprihvaćeno sredstvo komunikacije;
- imajući u vidu zahtjeve korisnika podataka, pozvala je nadležne institucije za statistiku u BiH za proizvodnju veće količine statističkih podataka za niže administrativno-teritorijalne nivoe;
- kod pregleda razvojnih ciljeva i prioritetnih aktivnosti navedeno je da se treba realizovati razvojni cilj: nastavak aktivnosti na izradi Nacionalne klasifikacije teritorijalnih jedinica za statistiku (NUTS) i dalji rad na izradi dokumenta „Prijedlog nomenklature statističkih teritorijalnih jedinica u BiH (NUTS1, NUTS2 i NUTS3); preporučuje da se ovim aktivnostima što prije pristupi;
- u svijetlu učestale pojave neispravnosti hrane u regiji, predlaže da se u okviru službene statistike prate statistički pokazatelji o sigurnosti hrane kojim bi se objavljivali setovi podataka o aktivnostima nadgledanja i kontrole proizvodnje i sigurnosti hrane i u tom smislu oformila baza podataka o proizvodnji hrane, a ministarstva poljoprivrede raspolažu značajnim podacima iz ove oblasti i mogli bi poslužiti kao administrativni izvor podataka;
- preporučuje da se u godišnjoj općoj publikaciji o statističkim podacima za BiH (BiH u brojevima) obuhvate podaci ne samo iz nadležnosti Agencije već i ostalih nadležnih/ovlaštenih tijela za poslove statistike (prije svega misli na statistiku zdravstva i na statistiku vladinih finansija; ohrabruje Centralnu banku u čijoj nadležnosti je ova statistika, da učini napore da budu dostupni ovi podaci i za niže nivoe vlasti, a potrebe korisnika sve više iziskuju i podatke o potrošnji javnih sredstava prema funkcijama vlade (odnosno prema COFOG klasifikaciji).

Gosp. Fatić je napomenuo da je ovaj Statistički program kvalitetan i da je svakako dobar prijedlog gđe Vujeve.

Za predloženi Statistički program Bosne i Hercegovine za period 2017-2020, glasali su svi prisutni, sa izuzetkom gđe Čičković koja je bila protiv.

#### **Ad 4.**

Predsjedavajući Vijeća, gosp. Sarajčić pozvao je direktora Agencije za statistiku BiH da obrazloži Prijedlog Plana rada Agencije za statistiku BiH za 2017. godinu.

Gosp. Jukić kao direktor Agencije za statistiku BiH prisutnim je ukratko pojasnio Plan rada Agencije za statistiku BiH za 2017. godinu, stavljajući akcenat na poboljšanje saradnje sa entitetskim statistikama, kao i aktivnosti koje će uslijediti, a to su pripreme za Popis poljoprivrede, poboljšanje već postojećih poslovnih procesa, kao i intenzivnija saradnja sa Centralnom bankom. Kao još jednu bitnu činjenicu naveo je kapacitet ljudskih resursa koji nije dovoljno popunjen da bi odgovorio sve većim zahtjevima koji se stavljaju pred statistiku. U skladu sa tim tražiti će se pomoć i Vijeća ministara BiH u smislu da se odobre nova zapošljavanja.

Gđa Čičković je istakla primjedbe Republičkog zavoda za statistiku Republike Srpske koje su prethodno dostavljene Agenciji i nisu prihvaćene.

Gđa Vujeva iznosi stav da je za ovaj dokument primjerenije da se nazove Godišnji plan službene statistike Bosne i Hercegovine za 2017. godinu ili Plan statističkih aktivnosti Bosne i Hercegovine za 2017. godinu. Dokument koji se razmatra naziva se Plan rada Agencije za statistiku BiH, a uključuje i aktivnosti ostalih tijela nadležnih/ovlaštenih za poslove službene statistike u Bosni i Hercegovini. Nadalje, prvi zadatak u okviru institucionalnog-zakonodavnog okvira za 2017. godinu navedeno je da je poboljšanje postojeće zakonske legislative radi usklađivanja s pravnim okvirom EU – preporučuje da se što prije krene s ovim aktivnostima u svijetu obaveza za Bosnu i Hercegovinu prema Sporazumu o stabilizaciji i pridrživanju.

Nakon provedene rasprave, predsjedavajući je dao na glasanje Prijedlog plana rada Agencije za statistiku za 2017. godinu. Za predloženi Plan rada Agencije za statistiku BiH za 2017. godinu, glasali su svi prisutni osim gđe Čičković koja je bila protiv.

#### **Ad 5.**

Pod ovom tačkom dnevnog reda gosp. Fatić je predložio dvije teme, a to su:

- Rad interesorne radne grupe za NUTS i
- Pitanje načina rada oko priprema za popis poljoprivrede, da li će se formirati interesorna radna grupa ili će Agencija za statistiku BiH ponuditi prijedlog načina rada i izradu potrebnih dokumenata.

Gđa Čičković predlaže da se oformi interesorna radna grupa za izradu metodologije rada, a da se prethodno donesu zakoni na entitetskom nivou kojima će se regulisati ova aktivnost.

Kao kompromisno rješenje gosp. Fatić predlaže da se oformi interesorna radna grupa koja će dati prijedlog aktivnosti i mjera koje će dovesti do rješenja.

Prisutni su se složili da se za ovo pitanje kao i aktivnosti oko interesorne radne grupe za NUTS, organizuje tematska sjednica u narednom periodu od 1 do 2 mjeseca.

Gosp. Fatić je još naveo da Agencija za statistiku BiH u skladu sa zakonskim ovlaštenjima treba da podrži angažovanje vanjskih stručnjaka i članova Vijeća, kada se za to ukaže potreba, a vezano za unaprijeđenje statističkog sistema. Gđa Čičković smatra da jedino Agencija može angažovati vanjske stručnjake, a da Vijeće nema taj mandat.

Gosp. Kremljčić je predložio da Agencija za statistiku BiH posjeti Republički zavod za statistiku Republike Srbije i potpiše sporazum o saradnji i pružanju informatičke podrške, što već ima Republički zavod statistike RS, a Federalni zavod za statistiku FBiH planira poduzeti aktivnosti oko istog.

Gosp. Jukić je obavijestio prisutne da je u proceduru upućen Prijedlog Odluke o visini novčane naknade za rad članova Vijeća za statistiku Bosne i Hercegovine, te da očekuje pozitivno mišljenje o čemu će blagovremeno informisati članove Vijeća za statistiku BiH.


Sjednica je završena u 14 sati i 15 minuta.

Zapisnik sastavila:  
Sekretar Vijeća za statistiku BiH

Anida Fazlić-Hadžić



Predsjedavajući Vijeća za statistiku BiH



Sahrudin Sarajčić